



## Tusagassiorfinnut nalunaarut Pressemeddelelse

### Kalaallit Nunaanni innuttaasut suliffeqarfiillu atugaat oqinnerussapput

Digitaliseeriinermut periusissiaq 2018-2021 nutaaq Naalakkersuisunit saqqummiunneqaqqammerpoq. *Digitaliseeriinermut periusissiaq 2018-2021 – Inuiaqatigiit Digitaliusut* atorlugu digitalinngorsaanerup iluani inuiaqatigiit siumut aallarnissaat Naalakkersuisunit kissaatigineqarpoq. Inuiaqatigiinni tamani digitalinngorsaaneq annertusarneqassaaq. Periusissiaq atorlugu nuaaliornissamut periarfissat nutaat ammaanepqassapput, inerisaasoqarnerulissaaq taavalu digitalinngorsaanikkut innuttaasut suliffeqarfiillu siunissami toqqammavissaat qulakkeerneqassaaq.

*”Periusissiap iluatsittumik atulersinnissaanut ataqaatigiissarineq, suleqatigiinneq, ammasuuneq aamma immikkoortut, tassa namminersortut pisortallu akornanni paasissutissanik paarlaasseqatigiinneq pingaarnertut inissisimapput. Digitaliseeriinermut periusissiaq 2018-2021-mi suliniutit atulersinneqarnissaannut qilanaarpunga. Periusissiaq piviusunngortinneqalereerpat, nunami nutaamik periarfissaqarluni innuttaasuuneq suliffeqarfiuteqarnerlu oqinnerulissaaq, tassanilu piffissaq sumiiffillu aamma sumiiffiit ungasissusaat apeqquutaajunnaarlutik tamat oqartussaaqataa nerat nukittorsarneqaatigaluni kiffartuussineq ingerlanneqarsinnaalissaaq. Tamatuma peqatigisaanik nunani tamalaani niueqatigiinnikkut isumannaatsumik ingerlatsisinnaaneq nukittorsarneqassaaq.”*, taama oqarpoq Vivian Motzfeldt, Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq.

Periusissiaq suliniuteqarfilinnik arfinilinnik sammisaqarpoq. Sammisat innuttaasunut suliffeqarfiutilinnullu tunngatillugu susassaqarfeqarpoq siammasissunik qitiusunillu.

#### 1. Innuttaasoq digitaliusoq

Misissuineq naapertorlugu Kalaallit Nunaanni oqarasuaatinik angallattakkanik smartphonenik taaneqartartunik tabletsinillu atuisartut amerliartuinnartut. Innuttaasut katillugit 83 %-ii internettimut atassuteqarput. Tamanna innuttaasunut suliffeqarfinnullu toqqissisimanartumik assigiissakkamillu misigisaqarnissaannut digitalimik aaqqiissutit pisortat assigiissaanissaanut atoruminarsaanissaanullu toqqammaviulluarpoq.

Brevdato: 19-09-2018  
Sags nr.  
Akt. nr. 3710651

Postboks 1037  
3900 Nuuk  
Tel. (+299) 34 50 00  
Fax (+299) 34 63 50  
E-mail: [ikin@nanoq.gl](mailto:ikin@nanoq.gl)  
[www.naalakkersuisut.gl](http://www.naalakkersuisut.gl)

Vivian Motzfeldt ima oqaaseqarpoq:

*"Digitalinngorsaaneq tamat oqartussaaqataanerata annertusarneqarpoq inuiqatigiillu pisortanut naalackersuinermillu aalajangikkanut takunnissinnaanerannut sakkutsialaalluni kiisalu tamat oqartussaaqataaneranni paasisanik peqataanissamillu naligiimmik pineqarnissamut periarfissiilluni".*

## 2. Sillimaniarneq aamma inuttut namminerisamik inuuneq

Digitalinngorsaaneq killeqanngilaq, taamaattumik aamma cyberimik navianartorsiortitaaneq pisinnaavoq. Sillimaniarnermut tunngatillugu arlalitsigut suliniuteqartoqartussaaavoq, tamannalu ilaatigut Namminersorlutik Oqartussat paasisutissiinermut isumannaallisaanerata inatsisillu nutaap kingunerisaanik nutarsaasoqartussaalluni.

Vivian Motzfeldt tamatumunga atatillugu ima oqaaseqarpoq:

*"Kalaallit Nunaata tutsuiginartuunissaa, isumannaatsuunissaa suleqataalluarnissaalu pingaaruteqarluinnarpoq, taamaattumik nunatut isumannaatsutut inissisimalernissaa anguniassavarput. Taamatut inissisimalernikkut nunani tamalaani inunnut paasisutissanut tunngatillugu niueqatigiinneq paarlaasseqatigiinnerlu annerulissaaq – assessuutigalugu peqqinnermut tunngatillugu".*

## 3. Digitaliusumik pissusissamisoortumik ileqqoqarneq

Innuttaasut qanorluunniit ukioqaralarunik illoqarfinni nunaqarfinnilu atuartsinikkut pitsaasumik periarfissaqartinneqarnissaat anguneqassaaq. Kingunerisaanillu alimasissumit atuartsineq, elektronikkikkut attaveqaatit atorlugit atuartsineq digitalimillu attaveqaateqarneq matumani tunngaviumik sakkussaammata annertusarneqassapput.

Kultureqarnermut tunngasut kalaallit kulturiisa kingornutarinissaanut attassiinnarnissaa siammarterinissarluk anguniarlugit sapinngisamik digitalinngorsarneqassapput.

Vivian Motzfeldt ima oqaaseqarpoq:

*"Meeqqatta digitaliusumik pissusissamisoortumik ileqqoqalernissaannut toqqammavilernissaanut tamatta akisussaaffigaarput, taassumalu inerisaqqinnissaa meeqqat atuarfiinit akisussaaffigalugu nanginneqassaaq, aammalu tamatta cyberimik atuinitsinni isumannaatsumik atuinissatsinnut akisussaaffeqarpugut. Taamatut ilisimasaqalernissamut elektronikkikkut attaveqaat atorlugu ilinnialernissaanut periarfissaavoq. Taamaattoqarnermi attaveqarnissat periarfissallu assigiissapput, taamaammata inuiaqatigiit qaninnerulerlutillu ataqatigiinnerulissallutik."*

## 4. Digitalimik ineriartortitsineq, aallarnisaaneq aamma inuussutissarsiuutit

Innuttaasut Sullissivik.gl-imut ataatsimik isaaveqarnerattulli inuussutissarsiuuteqarlutik namminersortut pisortanut ataatsimik isaaveqarnissaat Naalackersuisunit qulakkeerneqarumavoq. Inatsisitigut tunngavigisat, akileraartarnerit pissutsillu allanut tunngasut paasisaqarfiginiaraanni inuussutissarsiuuteqartunut ajornaannerusariaqarpoq.

Vivian Motzfeldt ima oqaaseqarpoq:

*"Allanngortiterinissamat piareersimanerput atorluassavarput. Digitalimik ineriartortitsineq aallarnisaanerlu nunami nukissiuuteqarnikkut suliaqartut peqatigalugit inuussutissarsiutinik, suliffeqarfinnik avataaniillu aningaasaliiniartunik nutaanik soorlu paasissutissanik ingerlatsivittut ittunik pilerisaarisoqassaaq. Inerisaanissamat periarfissat nutaat atorlugit inuiaqatigiit imminnut napatinniartut ikorfartorsinnaavaat."*

#### 5. Pisortani ataatsimoorussamik digitaliusumik aaqqissuussinerup sanarfineqarnera

Pisortani ataatsimoorussamik digitaliusumik aaqqissuussinerup sanarfineqarnerani attaveqaatip ataatsimoorussamik isumannaatsumillu paarlaasseqatigiiffiliorfiginissaa pingaaruteqarluinnartussaavoq, tassanilu pisiortorfiusut atuisullu pinsinnaatitaaffeqartut inuiaqatigiinnut digitalimik paasissutissaat isumannaatsumik ataavartumillu paarlaasseqatigiiffineqarsinnaallutik. Inuiaqatigiinnut tamanut inerisaataasumik paasissutissaqarnissaq tamatumuuna qularnaarneqassaaq.

Vivian Motzfeldt ima oqaaseqarpoq:

*"Paasissutissat digitalinngorsarneri pitsaanerumillu atoqqitassanngortinneri digitalimik aaqqiissuteqartumik pisortat ataqatigiinnerusumik naammassiuminarsakkamillu kiffartuussinissaat pilersinneqassaaq. Innuttaasut suliffeqarfiillu namminersortut pisortanut ajornaannerusumik iserfissaqalernissaannut qilanaarpunga, taakkumi oqartussa qarfiit akimorlugit pisortani ataqatigiissakkamik kiffartuunneqarneq misigisussaavaat."*

#### 6. Peqqinnissaqarfik digitaliseerigaanerusoq

Napparsimasunik nalunaarsuiffiup (EPJ) atulersinneqarnera peqqinnissaqarfiup digitaliseerigaaneranut alloriarnerusimavoq angisooq. Maanna EPJ-imi periarfissat aallutarineqassapput, aamma suli atorneqanngitsut ilanngullugit.

Vivian Motzfeldt ima oqaaseqarpoq:

*"Innuttaasut kikkulluunniit nuna tamakkerlugu peqqinnissaqarfimmi assigiimmik pineqarnissaq misigisavaat. Digitalinngorsaanermi suliniutit atorlugit aningaasartuutit ikilisarneqassapput, aningaasatigut atugassat pitsaanerumik atorneqassapput aamma peqqinnissami suliniutit innuttaasunut tamanut iluaqutaasussanngorlugit annertusarneqarnissaanut iluaqutaassapput".*

Periusissiaq tamarmi uani atuarneqarsinnaavoq [www.digitalimik.gl](http://www.digitalimik.gl).

Attavissaq:

Aqutsisoqarfimmi pisortaq John Siegstad

Oq./Tel.: +299 34 69 98

E-Mail: [jofs@nanoq.gl](mailto:jofs@nanoq.gl)